


誌
銘
廣
例



誌銘廣例

梁玉繩著

編主五雲王

編初成集書靈

例 廣 銘 誌

中華民國二十五年十二月初版

著 者 梁 玉 繩

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

翁

誌銘廣例

清 錢塘梁玉繩著

凡刻石顯立墓前者曰碑。曰碣。曰表。惟納於壙中。謂之誌銘。自有誌銘。而例因之以起。元潘蒼崖輯金石例十卷。明王止仲撰墓銘舉例四卷。餘姚黃梨洲著金石要例一卷。德州盧氏彙梓以行世。然標采雜錯。兼多漏略。覽者病之。余據耳目所及。別其類而補其遺。摘舊增新。次爲廣例二卷。廣變例也。碑表非誌銘而例有從全故并舉之嘉慶元年丙辰六月。

卷一 體式六十五例

卷二 書法二十三例

誌銘緣起

洪景伯隸釋謁者景君墓表跋。深譏王儉石誌不出禮典。近起元嘉之言爲非。蒼崖金石例。遂歷引諸書。辨墓誌始自殷周。夫博通如儉。豈不知之前賢未經循審耳。案南齊書禮志。皇太子穆妃薨。有司奏大明故事。太子妃元宮中有石誌。參議墓銘。不出禮典。宋元嘉中顏延之作王球石誌。素族無碑策。故以紀德。自爾以來。王公以下。咸共遵用。儲妃之重。禮殊恆列。既有哀策。不須石誌。是專指妃墓埋銘。不出禮典。非謂宋以前無墓誌。且亦非王儉一人之議也。而所云元嘉以來遵用者。因魏晉之世。禁斷立碑。

至劉宋時禁漸弛。故舉顏作王誌爲說。

誌銘解

墓石之文。分言之。則前序爲誌。韻語爲銘。通言之。則誌卽是銘。銘卽是誌。漢聞熹長韓仁銘。乃令牒無韻語。而謂之銘。韓文公法曹張君誌銘。敘次其族世名字。事始終。別無銘辭。而曰是爲銘。虞部張季友。考功盧東美。襄陽盧丞。司法李楚金。博士李于。諸篇皆然。止仲舉陳了齋侍郎鄒公埋銘。序而無銘。惟結以某官陳某敘次一語。葉適水心集媛女瘞銘。只敘其病夭卒葬。結以龍泉葉某記一語。是誌卽銘也。柳河東集中諸誌。皆有銘辭。而題止稱誌。白香山范陽張公仲方墓誌亦然。文選任彥升劉先生夫人墓誌。無誌但銘。而題獨稱誌。蘇文忠李太師墓誌。朱亥墓誌亦然。是銘卽誌也。六朝人文集往往銘而誌。胡君墓銘。盧渾君墓銘。皆銘而不序。故又有誌文之末不加銘曰二字者。如隸釋李翊碑。隸續郭君碑。王蘭泉侍郎和誌。銘皆銘而不序。故又有誌文之末不加銘曰二字者。如隸釋李翊碑。隸續郭君碑。王蘭泉侍郎和誌。石萃編。北魏司馬元興誌銘。懷令李超誌銘。俱無銘曰二字。

誌銘異稱

宋書禮志。漢以後天下送死奢靡。多作石室石獸碑銘等物。建安十年。魏武帝下令。不得厚葬。又禁立碑。高貴鄉公甘露二年。大將軍參軍太原王倫卒。倫兄俊作表德論。以述倫美。云。祇畏王典。不得爲銘。乃撰錄行事。就刊于墓之陰。此以論爲誌銘也。

歐陽公集古錄。宋宗慤母夫人墓誌。其後云。謹牒子孫男女次第名位婚嫁如左。漢韓仁銘是令牒。此以牒爲誌。

也。

蔡中郎議郎胡公夫人哀讚云。仰瞻二親。或有神誥靈表之文。作哀讚。書之於碑。歐陽公胥夫人墓誌云。爲哀詞一篇。藏諸墓。曾南豐蘇明允哀詞云。刻之於冢上。宋文鑑。張橫渠爲弟張天祺誌銘云。其兄載以報葬。不得請銘他人。手疏哀詞十二。各使刊石置壙中。示後人知德者。攀號之不足。又屬辭爲之誌。此以哀讚哀詞爲銘也。

隸釋雍勸碑刊石稱頌祝睦後碑。前稱頌曰。後稱辭曰。朱龜碑文末云。立碑作頌。高頤碑因作頌曰。金石萃編北魏司馬景和妻誌文末云。式述清高而爲頌。隸釋益州太守無名碑。前稱辭曰。後稱亂曰。巴郡太守樊敏碑。文後有辭曰。又有亂曰。李翊夫人碑。前有辭曰。後有歎曰。楊孟文頌。前有辭曰。後有序曰。隸續都鄉孝子嚴舉碑。文後有頌曰。又有亂曰。樊敏以下皆韻語韓文公施先生墓銘。前稱辭曰。後稱系曰。河東節度觀察使滎陽鄭公神道碑。前稱韓愈刻其墓碑曰。後稱系曰。元微之杜子美誌銘。前稱敍曰。言其詩。中稱系曰。言其世。次官位。末爲銘曰。此皆古人隨意爲之。其他漢唐墓石之文。多以銘曰爲辭曰。則不勝舉矣。

銘後有系

梨洲云。楊炯成知禮神道碑銘。後有系曰。若楚辭。別自一體。玉繩案隸釋綏民校尉熊君碑。銘詞之後提行。又有追敍君兮一段。北海相景君太守樊敏。孝廉柳敏諸碑。銘後皆有亂曰一段。楊碑倣漢製也。

誄全誌銘

梨洲云。誄亦納于壙中。故柳州虞鶴鳴誄云。追列遺懿。求諸后土。誌銘亦可謂之誄。元鄭師山爲洪頤誄。銘云。其門人俞溥狀其言行。俾爲之誄。以識其葬。玉繩案金石錄。費鳳碑。追而誄之。隸釋。景君銘。乃作誄曰。隸續。嚴訢碑。故著名誄。是以誄爲銘也。校官碑前稱誄曰。後稱敘曰。是又以誄爲散文。以敘爲銘也。柳鄭蓋用漢例。

以別序當誌銘

司馬溫公序劉道原十國紀年。不復志其墓。令其子義仲。卽以序勒石納諸壙。此創例也。全謝山太史祖望作錢退山侍御東村集序。卽援此例。以序納之墓中。

畫像作誌銘

全謝山跋四明尊者教行錄云。古人有畫像記畫像贊二種。獨宋慶元庚申。沙門善月爲四明尊者法智作像誌銘。是文章體例中所未有也。

行狀爲碑

全謝山云。輿地碑記目。廬州有唐旌表萬敬儒孝行狀碑。化州譙國夫人冼氏廟有行狀碑。乃知行狀亦碑版文字之一。而高僧尤多以行述刻碑。或直謂之墓狀也。

題無定稱

題爲文之綱。然古無一定之例。或稱先生及私諡別號。而不書其官。或略其官而字之。或直書其名。或止書其氏。今人不能倣也。止仲舉朱文公劉十九府君誌銘。題書其第。曾南豐亡妻宜興縣君文柔晁氏誌銘。婦人而題書其字。則皆僅見者。凡題曰元堂。誌曰窆域。誌曰葬。誌曰墓。識曰厝。誌曰祔。誌曰殯。誌曰葬。記曰墓。記曰塋。兆記曰壙。記曰墳。記曰石。記曰碑。記曰塔。記曰壙。銘曰埋。銘曰瘞。銘曰墓。磚銘曰墓。版文曰石。槨銘。名雖不全。俱誌銘之類耳。歐陽公瀧岡肝表題以地書亦僅見

題書郡望

金石萃編。天寶七載潘智昭誌銘。題云唐故吏部常選廣宗郡潘府君墓誌銘。王蘭泉云。誌銘從未有以郡望冠其姓而題于前者。以爲異例。

題用墓字異

韓文考異。中散大夫少府監胡良公墓神道碑。莆田方氏云。神道碑不著墓字。惟此有之。變例也。玉繩案。胡公諱响。字潤博。張籍妻父。題中良字。不可解。方本無良字。當是方氏名崧卿字季申。

題與文分兩人

止仲云。撰文製題。皆出一手。無別製題者。朱文公篤行趙君彥遠墓碣銘云。福國陳公大書其碣之首曰。皇宋篤行趙君彥遠之墓。而子某使人奉狀請銘。而刻諸下方。則撰文製題出兩人矣。此與篆額不全

題分兩稱

開元三年四月馮十一娘誌銘。題云將作監主簿孟友直女墓誌。額云唐故馮氏婦墓誌之銘。見臨海洪頤煊平津讀碑記。

題書文略

姓氏官位已見於題。則文中略而不書。北魏司馬元興誌銘。題云魏故甯朔將軍固州鎮將鎮東將軍漁陽太守宜陽子司馬元興墓誌銘。而文但敘事無一言及其官。韓文公劉統軍獨孤少監鄭郎中董刺史崔評事諸誌銘。柳河東張中散誌銘。歐陽公孫侍制誌銘。皆不書姓。以題已著之。不再出也。亦有見于文而路于題者。金石萃編北魏司馬晒夫人誌銘云。夫人姓孟。字敬訓。清河人。而題云司馬景和妻墓誌銘。不著其妻姓矣。

題書僧姓

金石萃編大歷三年義琬禪師誌銘。題云唐故張禪師墓誌銘。題書其姓僅見。但文中稱俗姓董氏也。

題書妻合葬

黃梨洲閩百詩汪堯峰諸公皆言古人合葬。題不書婦。蓋女統于男之義。至明李空同集始有合葬字。王遵巖一輩乃有暨配字。先曾祖考妣墓誌銘董浦杭先生諱世代溧陽史文靖公撰。先文莊公嘗以題書暨配合葬爲疑。先生復書曰。梨洲黃氏云。婦人從夫。故誌合葬者。其題只書某官某公志銘或墓表。未有書暨配某氏也。引張說爲蕭灌楊炯爲王義重兩神道碑爲證。且曰。自唐至元。皆無夫婦仝列者。徐

司寇作讀禮通考。據其舅氏亭林先生所撰金石文字記。有澤王府主簿梁府君并夫人唐氏墓誌銘。四品孫義陽朱賓撰。唐武后垂拱四年十一月也。又滎陽鄭府君夫人博陵崔氏合祔墓志銘。秦貫撰。宣宗大中十二年二月也。據此則古人亦有書婦者矣。黃氏良由未見兩碑。輕易詆駁。未可卽爲定論。閣下太夫人先歿。歷二十年。朝廷復有贈典。照耀遠近。固當鄭重。特況梁府君又君家之前事乎。但其志新出。終南山榿梓谷土中。鄭志得之魏縣上中梁志出榿梓谷黃氏未及見。王遵巖處士陳東莊公暨配黎氏墓表。魏叔子楊一水全配嚴孺人合葬墓表。袁君泰徵全配吳節母合葬墓誌銘。二公皆名能古文者。其文炳見於集中。如有譏我者。可援以相證矣。古人行文與作事。皆有就簡之理。何謂就簡。其一夫一婦固已。人有再娶至三四娶者。吾鄉沈端恪公蓋嘗五娶。皆已前歿。神道之碑。亦鄙人所撰。若皆列則額隘而不可篆。其皆削而不列。亦事勢然也。或夫在而妻先卒。別爲立碑。昌黎爲都統韓弘妻撰銘是也。或子爲母刻石。臨川爲楊學士母撰誌銘是也。其首必冠以某官某之妻。誠有如黎洲黃氏所云。至於夫自立碑。或書配某。或不書。則因乎其人。因乎其時。於禮無礙。原無一定之製。亦無一定之例也。而爲金石之例者。必沾沾執一例以相繩。不亦慎乎。鄙人文不足重。閣下聲華爵位爲海內所具瞻。旣不爲例所拘。又有所據依。而非出於獨創。斷然行之。可無疑也。玉繩案。王咸陽金石遺文。唐故幽州良鄉府折衝都尉上柱國宏農楊府君夫人潁川陳氏誌銘。其略云。君諱惠策。閬鄉人也。夫人潁川陳氏。並登偕老。俱享延齡。府君年九十八。大曆十三年三月十四日卒。夫人八十七。永泰二年八月十八日終。以大歷十

三年歲次戊午十一月七日合葬于本縣望鄉里之平原金石萃編開成六年唐貝州永濟縣故馬公名郝氏二夫人誌銘會昌四年尹府君朱夫人誌銘樓鑰攻媿集朝請大夫吳公并碩人姚氏誌銘叔祖居士并張夫人誌銘韓元吉南澗稟沈氏考妣誌銘蓋明人所本不獨朱秦兩碑爲然

誌不可冗

洪容齋四筆云東坡爲張文定公作墓誌銘有答其子厚之書云志文路中已作得太半到此百冗未絕筆計得十日半月乃成然書大事略小節已有六千餘字若纖悉盡書萬字不了古無此例也知之知之蓋當時恕之意但欲務多耳今志文正本凡七千一百字銘詩一百六十字予鄉士作一列大夫小郡守行狀九千言衢州士人上書二萬言讀之豈不厭倦作文者宜戒之太僕陳先生兆嘗謂余曰冗固不可若事有足書雖長何害兩漢列傳有一人而分兩卷者不得以爲冗也

書先世無例

閻氏潛邱劄記云凡敍人家世皆自曾祖以下無及高祖者聞及高祖亦必其人其事足書非空空僅及其名諱而已董浦先生嘗譏其不知例以爲漢唐以來或歷舉世次或錯舉遠祖或書始祖始遷祖或從高祖起或從曾祖起或止書祖父或止書父或先世概不書只述本身無一定也

先世書官不名

東漢碑多不書先世名諱趙德夫云爲子孫作銘不欲名其父祖此最得體玉繩案集古錄金石錄隸釋

隸續所載漢碑皆書官而不書名亦是當時一例。檢文苑英華及金石萃編隋以前猶如此。至唐則罕見矣。

文不書諱

隸釋故民吳仲山碑字而不名。袁簡齋明府枚隨園隨筆唐天寶時張府君誌銘但稱字希古不書其名。然猶字之也。東坡李太師墓誌名與字皆逸之矣。乃又有曰某者。洪容齋三筆云碑誌之作本孝子慈孫欲以稱揚其父祖之功德播之當時垂之後世當直存其名字無所避隱。然自唐及本朝名人文集所志往往只稱君諱某字某。至於記序之文亦然。王荊公爲多。殆與求文揚名之旨不相契。

銘用散文

止仲云韓文公河東節度觀察使滎陽鄭公神道碑歐陽公長安郡太君盧氏誌銘王介甫太常博士曾公誌銘尹師魯將仕郎守瀛州樂壽縣尉任君誌銘大中大夫尙書屯田郎中分司西京上柱國王公誌銘三班奉職尹府君誌銘曾南豐刑部郎中張府君神道碑以議論爲銘辭而不用詩是一例也。玉繩案葉水心集如郭良臣蔡待時姜處恭丁希亮諸誌皆以無韻散文爲銘。

以誌體爲銘

柳仲塗宋故和州團練使李侯誌銘。惟王建侯甯邦國曰咨爾守節爾之良予其耿乃休光爾之素乃成績顛隕其追弗庸克自及予將其試汝汝侯于乃單單惟政有成汝其遷于濟濟既五年始來朝曰西

北晉姦也。汝居遼以捍之。久弗易厥初。民兵且完。曰東南吳臣也。汝徙和以接之。逮明年。侯死。有仲曰鈞。歸侯于濟。冬定葬於西。客有誌且銘之者。此文代夢壽作故云客曰晉陽李氏者。侯之姓也。曰守節而得臣者。侯之名且字也。太尉贈封曰植者。侯之曾祖也。太師贈封曰益者。侯之王父也。滑相潞三節度曰筠者。侯之先也。東頭供奉而追皇城使者。侯之四命而職於內也。始于單而訖于和。曰團練使者。侯之四封而牧於外也。起仕于周而暨我宋者。侯之歷兩朝而臣三帝也。十五年學于家。而十八年位于世者。侯之壽三十有三也。歲辛未而春戊辰者。侯之薨。曰開寶四年二月二日也。冬季庚寅而襄事者。侯之于是歲而封于墓也。二季掌後而主喪者。侯之無子男而有女也。哭室而奠帷者。侯之妻曰符氏也。某州某縣某里者。侯之先塋。今從葬也。撫辭而書石者。侯之館客戚內夢壽也。

撰銘如誌

敘事在韻語中。此體蓋始於韓文公劉統軍碑。止仲黎洲所舉韓柳歐王諸篇。世系名字。鄉邑歷官。壽年葬地。雖見於銘。然皆短章數韻。茲不重述。只取序略銘詳者數家摘而載之。

劉統軍碑。唐故陳許軍節度使。金紫光祿大夫。檢校尚書左僕射。兼御史大夫。右龍武統軍。彭城郡開國公。食邑二千戶。贈潞州大都督。劉公諱昌裔。字光後。薨既葬。將反机於京。舍於墓次。故吏文武士門人送客訖事。會哭將退。咸顧戀牽連。一口言曰。自我公薨至葬。凡所以較德悼勤者。莫不粗完。隱卒崇終。有都督之詔。日事時功。以著不可誣。有太史之狀。太常之狀。有諡有誥。有幽堂之銘。又如卽外碑刻。

文以詩顯之。其於傳無已。豈不益可保。於是相許諾。以告其孤縱。縱哭捨杖拜曰。縱不敢違。則相與刻銘文曰。劉處彭城。本自楚元。陽曲之別。繇公祖遷。公會祖考。爲朔州守。祖令太原。仍世北邊。樂其高寒。棄楚不還。逮於公身。三世晉人。公生而異。魁顏鉅鼻。幼如舒退。少長好事。西戎乘勢。盜有河外。公雖家居。爲國暗噫。來告邊帥。可破之計。楊琳爲橫。巴蜀靡彫。公由游寄。單船諭詔。折其尾毒。不得動搖。琳後來降。公不有功。終琳之已。還臥民里。蓋古有云。人職其憂。無事於職。而與國謀。德宗之始。爲曲環起。奮筆爲檄。強寇氣死。決敗算成。效於屈指。環有許師。公遂佐之。蘇民軋敵。多出公畫。累拜郎中。進兼中丞。雖在陪貳。天子所憑。蔡卒幸喪。圍我許鄆。新師不牢。劬勩將逋。公爲陳方。應變爲械。與之上下。寇無所賴。遂至遁敗。以功遷陳。實許之半。聲駕元侯。以勢自憚。復入居許。爲軍司馬。脫權下威。士心益歸。卒嗣環職。業惡崇德。乃與蔡通。塗其荆棘。稚毫嬉遨。連手歌謳。上無可怨。下無與讎。旣長事官。峻之大夫。其僨未塞。僕射以都。及癸巳歲。秋涌水出。流過其部。破民廬室。公卽疏言。此皆臣僊。防斷不補。漬民於泉。臣毫且疾。宜卽大罰。上曰。燭害大臣其來。允余之思。其可止哉。驛隸走呼。有中使來。公迎於驛。遂行不迴。六月降熱。上下歛絕。公鞭公驅去。馬以輿。公病日惡。不能造闕。仆臥在宅。閔有加錫。命爲統軍。龍武之右。兼官左相。百僚長首。冬十一月。日將南至。公遂薨。殂年六十二。奏聞怛悼。俾官臨弔。悲不聽朝。贈督潞州。存歿之賚。於數爲優。明年九月。東葬金谷。公往有命。匪後人卜。王介甫梅公神道碑。宋翰林侍讀學士。正奉大夫。行給事中。知許州軍州事。兼管內堤堰橋道勸農事。上柱國。南昌郡開國公。食邑

二千三百戶。食實封六百戶。賜紫金魚袋。梅公之墓。在宣州宣城縣長安鄉西山里。公有五子。鼎臣、德臣、實臣、輔臣、清臣。清臣今獨在。爲尙書司門郎中。以公行狀及樂安歐陽公之銘來。請文以刻墓碑。時熙甯元年八月四日也。銘曰。公先梅伯。後氏其國。彌周涉秦。不見史策。有銷有福。著漢名籍。公福之孫。詢字昌言。三世弗仕。陵陽之里。公第廷中。判官利豐。再歲而擢。以丞將作。以宰仁和人。譽用多。主推御史。侍考進士。一見天子。以爲知己。詔曰。試哉。遂試中書館之集賢。賜服緋魚。於時繼遷兵我西鄙。老弱餽守。丁彊多死。靈州告□。□視不怡。公請擇人。使潘羅支。兵法所謂。以夷攻夷。帝曰。誰□。無如臣者。曰。予汝嘉。閉陷奈何。公拜且跪。颺言而起。苟紆□師。臣不愛死。出書授之。往訖爾謀。至疆勅還。會棄靈州。帝察公藝。可書帝制。相或止之。留佐三司。其後羅支果竄西賊。論將料敵。皆如所策。或從或違。或擠或推。悟合阻夷。神者公尸。黜之倅州。用獄一眚。去杭而蘇。列國東屏。漕輸淞河。就付將領。三年告功。僅得故省。又以譴投。守彼淮州。有僚許公。相得於此。與之欣然。樂以忘徙。使於湖北。遷自濠梁。又奪一官。往裨於襄。坐發驛馬。給奔喪者。於鄂於蘇。剖將之符。握節關中。使總其輸。煌煌金章。厥錫特殊。謀復靈武。度兵葫蘆。秦有將璋。諾公與俱。會璋召還。公復淪胥。有反咸陽。能名氏朱。始雖弗察。後捕而誅。自懷徂池。再副戎章。眞宗新陟。罪垢皆滌。爲郎度支。以將廣德。外更四州。楚壽陝荆。乃還待制。中糾獄刑。有歸龍圖。其唐殖殖。就以學士。專其閣直。輟之銓衡。乘傳臨并。超遷郎秩。進植樞密。趣歸封駁。考國中失。申命選事。得權進紉。加職侍讀。改司羣牧。移之審官。審是在服。伐閱積遷。給事於中。告疾出許。鼓歌從容。

方公少壯志立人上。談辭慨然。帝悅而嚮。及後晚出。皆爲將相。公則老矣。將歸田里。康定辛巳六月。日公七十八。以其官卒。公開南昌勳爵第一。夫人曰劉。不及郡封。封君彭城。其卒先公。公卒明年。季秋挾日於州山西。卜祔而吉。公有四子。伯爲進士。丞於殿中。與仲前死。仲賜科名。叔也。皆丞。將作殿中。或廢或興。有顯惟季。時丞衛尉。今爲郎中。論序初終。實來求詩。刻示無窮。虞部郎中晁君誌銘。尙書虞部郎中晁君諱仲參。字孝先。以治平四年五月九日卒於通判舒州事。其子以熙甯二年正月二十九日卜濟州任城縣諫議鄉呂村之原。以葬。狀君之行來乞銘。掇其語爲銘曰。晁望潁川。衛有卿丙。錯以循用。作漢家令。魏晉南北。史無傳人。良正官唐。仍不大振。開封于家。徙鉅野縣。辟時轄屯。出宋而顯。迴奮布衣。太子太師。宗慤秉政。父子一時。三朝四世。錫榮正墓。佞令中書。爲君曾祖。有子迪者。刑部侍郎。乃生宗簡。世德孔揚。使京東西。郎于刑部。君實其嗣。少則多譽。仲父保任。主簿上虞。宰墨隲政。易君仕初。從容調。吏莫玩法。墨以廉終。弱伸強懾。按察擾獄。夙如我謀。君不爲奪。械囚于州。將范文正。歎愛而謂。畏宜繼私。公勇勿畏。君願持此。畢身無尤。薦監越酒。旋宅父憂。判官于滁。擢丞大理。汝州郟城。來知縣事。富姓賕吏。寓田勢家。役煩且窘。中戶愁嗟。君哀僞券。應手卽辨。完蠹噓枯。俗戒以勸。秦王諸孫。上冢入郛。卒榜驛隸。君擒而誅。將勅中人。匿車夜遁。移內侍省。罪令卽訊。迄明年至。徒御無譁。能聲震越。號稱其家。易曹濟陰。太子贊善。督尉索盜。里閭宴衍。馬入罷牧。地租于民。廚傳費劇。輸之殆貧。君曰。閔哉。責豈無豫。操膏鑄守。多紕其數。遷官博士。去領開州。大築學校。率衣冠游。溫湯之鹽。實不酬課。歲

獨百萬。奏自君可。氓疾不治。謁巫代醫。教以餌藥。盡投詭祠。失怙恃者。予其娶嫁。坐堂朝晡。飲酒閒暇。英宗纂極。員外于虞。比駕二部。閱最而除。今天子恩。始正卽位。攝舒某年。條教逾肆。殍來鄰邦。賑使無僵。扶攜飽去。又遣之糧。敦於除害。未始愛力。取樅陽河。避羅刹石。折池口征。合于銅陵。官不失算。舟無危行。人幸是爲。曠數十載。趨令謹呼。無有稚艾。孤山馬當。歲漂百航。鑿秋口浦。直走雷江。脫險風濤。幾五百里。章隨驛聞。就付其事。方冬告役。君夏而殂。壽五十五。識者歎吁。齊公孫氏。作配甚似。封永康君。誕惟四子。端仁端義。端禮端智。仁中進士。常州司理。義郊社郎。餘則未仕。五女四人。歸爲士妻。石端侯彥。侯歸而嫠。范胡二壻。純粹僧孺。幼處于家。君孫有五。男節符錢。其二則女。惟君平生。外晦內明。忤出不意。默無與爭。祿賜族嫻。恩稱疎戚。庖無朝炊。笑語如昔。晚尤靜曠。病不告遺。極談性命。方絕之時。子丐埋辭。哀輿走汴。掇其緒餘。以質幽竊。京東提點刑獄陸君誌銘。提點京東諸州軍刑獄公事。兼本路勸農事。朝奉郎。尚書司封員外郎。充集賢校理。上輕車都尉。賜緋魚袋。借紫陸君。諱廣。字彥博。其先吳郡人也。至君之高祖。始遷福州之侯官。以避唐末之亂。曾祖諱景遷。仕吳越。爲驍騎上將。官檢校太傅。祖諱崇辰。以威武軍觀察。推官從其王歸京師。官至殿中丞。歷知瀘道。潮貴四州。以卒。考諱中和。不仕。以君故。贈官至尚書職方員外郎。君以天聖二年進士起。至皇祐四年某月。以使走齊州。某甲子。卒於鄆之平陰。君子長倩等。以嘉祐四年某月某甲子。葬君杭州之錢唐某所之原。而書君繫世官職行能勞烈卒葬之地。一時以來求誌墓銘曰。於惟陸氏。吳郡其始。福之侯官。近自唐徙。君曾大考。太傅將